

"Tres Diferente Ruta" buki cu cada famia mester lesa



Herman Hennepe, recientemente a bolbe publica un buki, cu e biaha aki ta toca un otro topico, cu e tin custumber di relata. Ta trata aki di Tres Diferente Ruta. Riba nos pregunta, duna un splicacion di e titulo aki, y kico tabata su inspiracion, Herman Hennepe a toca un topico cu ta noticia casi tur dia.

Aki ta trata di 3 hoben cu cada uno cu diferente motibo, a drenta mundo di droga. Y e storia relata den e buki Tres Diferente Ruta, ta relata con nan ta anda den e mudno aki, cu sigur no ta nada positivo, pa ningun hende.

Durante e anochi aki na Biblioteca Nacional, unda tabatin un concurrencia basta aceptabel, tabata Ramon Todd Dandare, tabata maestro di ceremonia, y e no por a keda sin comenta riba e buki, alegando cu den e buki aki, maske cu ta trata di 3 diferente hoben, tin similaridad den cada famia na Aruba, unda droga tambe a bati na nan porta. E alumnonan di EPB, a duna un presentacion masha yamativo pa trata di ilustra e contenido di e buki aki. E ta un buki agradabel pa lesa, scirbi na un manera simpel, cu ta papia di e 3 hobennan, Jeremy, Roy y Rita, cada uno cu otro buelta di bida, causa pa situacion familiar y despues ta cai den droga.

Manera menciona, ora di lesa e buki aki, bo ta haya e impresion cu bo conoce un di e 3 personahenan aki, sea den famia of na bisiña o conoer. Pasobra droga a bati porta di cas di hopi di nos hendenan.

Mirando cu esaki ta otro obra di nos propio hende, ta bon pa nos sostene e esfuerzo cu den e caso aki Herman (Manchi) Hennepe a haci, pa trece un obra na prome lugar, educativo, y na di dos lugar, masha informativo y scirbi na Papiamentu, loke ta haci'e mas dushi ainda.

Hopi hende lo kier sa ta kende Manchi Hennepe mes ta? Wel, e t'e persona cu nos ta mira den cayanan di Oranjestad den un rolstoel pusha pa su señora. Y semper nan dos cu sonrisa riba nan cara y personalmente, dos persona masha agradabel mes pa papia cu nan. Un pabien, sigur ta na su lugar pa Herman (Manchi) Hennepe cu otro logro cu e buki aki, Tres Diferente Ruta".

Siman pasa, e pareha a haci nos Director un bishita, unda un biaha mas a intercambia di idea y futuro planan pa bin cu mas buki. AWEMainta sigur ta sostene autornan asina, cu ta biba cu preocupacion di nos sociedad.